

四庫全書

子部

欽定四庫全書

子部

古今事文類聚外集卷八

詳校官中書臣沈颺

侍讀臣孫球覆勘

總校官編修臣王燕緒

校對官中書臣王家賓

謄錄監生臣李廷讓

欽定四庫全書

古今事文類聚外集卷七

元 富大用 編

諸使司部

宣慰使

歷代沿革宣慰使始於唐初元和置淄青兗豫等州宣撫使後始置宣慰使大率藩方不靖則遣重臣宣諭慰安之故有宣慰使之名宋置宣諭使以宣諭德意為職

而已不與軍事無宣慰官元沿唐制置宣慰使副使斷
事官經歷知事等員

古今事實

持節直入

徐州張建封卒兵亂囚監軍逼建封于愔主軍務帝以
李鄲剛敢拜宣慰使持節直入其軍大會士諭以禍福
出監軍獄中脫桎梏使復位愔即上表謝罪稱留後鄲
曰非詔命安得輒稱之削去乃受既還稱旨遷郎中

行營面詰

憲宗因淮西久未成功遣尚書左丞許孟容行營宣慰
令面詰責光顏重脣一月內賊平

宣慰河北

王縉祿山亂擢太原少尹佐李光弼以功加憲部侍郎
遷兵部史朝義平詔宣慰河北還有旨俄拜黃門侍郎

同平章事鎮河東節度

本傳

宣慰魏博

田弘正圖魏博相衛貝瀧之地籍其人以獻憲宗美其誠詔充魏博節度使又遣裴度宣慰度明辨具陳朝廷厚意弘正不覺自失乃深相結納奉上益謹復請度徧行其部宣示天子恩詔魏人由是歡服又裴度至魏博宣慰以錢百五十萬緡賞軍士六州百姓給復一年軍士受賜歡聲如雷

並本傳

馬總副裴度

馬總副裴度宣慰淮西吳元濟擒為彰義節度留後蔡

人習偽惡相掉許獷戾有夷貊風總為設教令明賞罰
磨治洗汰其俗一變

本傳

巢父見田悅

孔巢父為魏博宣慰使巢父辨而才及見田悅與言君
臣大義利害逆順時悅久不臣喜曰不圖今日還為王
人酒中悅起自陳騎射且曰陛下見用何敵不摧巢父
曰若爾不早引歸乃一劇賊耳國方多虞待子而息數
日田緒殺悅遂與大將邢曹俊等聽命巢父即以緒權

知軍務紓其難

無若孟陽

唐憲宗詔潘孟陽往江淮察諸使治否孟陽所至流連倡樂招金錢其後鄭放宣慰江淮帝譏之曰無若潘孟陽殫財費酣飲遊山寺而已

卒害真卿

盧杞德宗時拜同平章事既得志險賊浸露賢者媚能者忌小忤已不傳死地不止李希烈反杞素惡顏真卿

挺正敢言即令宣慰其軍卒為賊害李揆有雅望畏復
用遣為吐蕃會盟使卒于行天下無不痛憤以杞得君
故不敢言

本傳

宣撫使

歷代沿革唐元和十四年淄青兗鄆等十二州平詔戶部
侍郎楊於陵以本官充淄青等宣撫使宋祖宗時不常
置有軍旅大事則命執政大臣為之累朝但除向文簡
范文正富文忠文忠烈韓獻肅五人仁宗征儂智高以

狄青為宣撫使武臣宣撫自此始建炎三年張魏公以知樞密院為宣撫處置使其後杜丞相周仲弼孟富文趙元鎮虞樞甫王公明鄭仲一沈德之輩皆自二府出為之虞公始以元樞除大資政矣上恐未足為重後二日乃復帶知樞密院事焉若前宰相為宣撫則自渡江已後亦止除李伯紀呂元直朱藏一三人紹興元年劉光世以使相宣撫淮南武臣非執政而為之自此始二年李泰發以端明殿學士為壽春等州宣撫使文臣非

執政而為之自此始然自紹興至嘉泰武臣止劉光世韓世忠張俊岳飛吳璘從官止李光發王伯似二人蓋重之也元仍唐宋制置之

古今事實

便宜行事

樞密直學士明鎬討貝州未下參知政事文彥博請自往督戰以彥博為河北宣撫使彥博奏今在軍中請得便宜從事上許之閏月克貝州擒王則

涑水
記聞

節制諸將

鄭剛中字亨仲為川陝宣撫副使節制諸將極其尊嚴
三都統每入謁必先庭揖然後就坐及吳璘升檢校少
師來謝語主閤吏求講釣敵之禮剛中曰少師雖尊猶
都統制耳倘變常禮是廢軍容璘惶恐聽命

中興係
年錄

活饑民

慶厯三年韓琦宣撫陝西屬歲大饑羣盜嘯聚悉討平
之是歲河中同華等十餘州饑民相率東徙選官發省

倉以賑之蒲華同三州所活百五十四萬餘人他州稱

是召琦歸闕

編年
備要

修軍政

虞忠肅公允文為四川宣撫首劾大將任天錫剝下為
苞苴又劾守令劉洪宋琛等十一人之病民者又薦可
為將帥三人進偏裨二百餘人諸軍歡呼西蜀交賀於
是開公平之路絕請謁之私而軍政修矣

言行
錄

智高戰敗

狄武襄公青廣源州蠻儂智高叛連破七州仁宗遣青為宣撫使率衆擊之至賓州時儂寇還守邕州青懼崑崙關為所據乃下令具五日糧休士卒賊謀知不為備是夜青率衆度崑崙關近邕州賊方覺逆戰於歸仁鋪賊遂大敗

忠彥械誅

李綱字伯紀為湖廣宣撫使有統制官張忠彥者駐廣州頗擾一路公為宣撫使召之不來公察忠彥樂為郡

檄令權知岳陽忠彥果至即械送所司取旨誅之

並同上

僉書出鎮

治平三年以僉書郭達宣撫陝西判渭川上曰第領樞職獨重使權自呂餘慶以參知政事知成都其後見任執政無守藩者至達始以僉書出鎮

編年
備考

御殿置宴

咸平三年詔兵部侍郎參知政事向敏中充河北東路沿邊宣撫大使樞密直學士馮拯陳堯叟充副大使巡

按郡國存問官吏將校耆老百姓等真宗御長春殿置宴以遣之

就拜平章

韓康國公絳熙寧二年夏羗大入慶州境以公為陝西宣撫使自受命至陛辭三日而行贈金繒及織文袍纔至邊悉與將吏治兵廨延使种諤出青澗城公欲自高奴通道河東詔兼河東宣撫使就拜同中書門下平章

事

言行錄

功出儒者

虞忠肅公允文字彬父金亮叛順王權失律公以宣撫
視師江上大破賊軍金亮遁入揚州是日李顯忠至公
曰京口無備我欲往公能分兵見助否顯忠即分李捧
軍一萬六千人及戈船百艘會於京口公至京口謁劉
錡錡曰朝廷養兵三十年我輩一技不施今日大功乃
出於一儒者我輩愧死矣

同上

古今文集

律詩

和餞王暄巡邊

張說

六月歌周雅三邊諗夏卿欲施攻戰法先作簡稽
行禮樂知謀帥春秋識用兵一勞堪定國萬里即
長城策布和戎利威傳破虜名軍前雨灑道樓上
月臨營別藻瑤華降同衣錦褱榮闕山由義近戈
甲為恩輕絲竹路傍散風雲馬上生朝廷為吉甫
邦國望君平

送鮑中丞赴太原

盧綸

暫趨西掖望全解北門憂專幕臨初護親營制督郵

送范司空赴朔方

呂溫

築壇登上將膝席委前籌虜滅南侵趾朝分北顧憂抗
旌迴廣漢撫劒動旄頭

安撫使

歷代沿革梁武帝普通六年魏以酈道元為大使慰撫
六鎮大使始此隋文帝開皇九年詔遣柱國韋洸安撫

嶺外又仁壽四年以楊素為并州道行軍總管河北道
安撫大使唐貞觀初遣大使十三人巡省天下諸州水
旱則有巡察安撫存撫之名節度使兼之則有副使天
授二年發十道存撫使聖歷中狄仁傑為河北道安撫德
宗正元又置副使宋舊不常置自咸平二年以翰林學士
王欽若為四川安撫使知制誥梁顥為陝西安撫使安撫
使之名始此其後景德三年始置河北沿邊安撫使以雄
州守臣為之而陝西沿邊諸州亦有安撫使慶歷二年詔

置湖南安撫司八年詔置河北四路安撫以韓琦王拱辰
賈昌朝等充諸路使皇祐四年詔廣桂二州帶經略安撫
使熙寧五年罷諸路經略安撫司崇寧二年置河南安撫
使宣和二年置輔郡內潁昌府帶京西安撫使宣和三年
臣僚言睦賊猖獗乞以杭越知州兼本路安撫鎮撫一方
詔杭越州江寧府守臣並帶安撫使詔洪州守臣可依江
寧府安撫使凡諸路安撫逐州知州兼以直秘閣以上充
掌總護諸將統制軍旅察治姦宄以肅清一道凡兵民之

政皆掌焉帥其屬而聽其獄訟頒其禁令定其賞罰稽其錢穀甲械出納之名籍其行以法若事難專決則具可否稟奏即于機速邊防及士卒抵罪則聽以便宜裁斷係邊任則綏御塞外撫寧疆圉若甲兵屯戍芻粟餽運則視其緩急盈虛而移用之掌凡戰守之事建炎元年李綱請沿河沿淮沿江置安撫使兼馬步軍都總管以文臣充二年令將兵處知州帶管內安撫使後省四年置鎮撫使罷逐路安撫使後罷鎮撫使置安撫使如故時諸路又有安撫

大使自兩浙西路劉光世始二品以上為帥即為安撫

大使元有安撫使又有副使正使正三品副使正四品

羣書要語內有百揆四岳外有州牧侯伯書藩侯詩千

里之外設方伯記受瑞析圭建麾作牧文當藩垣屏翰

之任有弓矢鈇鉞之權韓文送俱五都伯長送張童方

州大臣答元侍大夫烏公以鈇鉞鎮河陽送溫來帥熊

羆四方作儀連理出咨岳政入填邦紀惠文太繫我輔

臣伯茲列岳冊尊尹正大都節度羣州皇甫湜荆南大

旆高牙任雄節制

楊億代表

代荷寵榮謬居垣翰

李師道詔

無安

帥節之樂猶侍袞衣之選

韓琦判相州制

詩句印綬歸台室旌旗別將壇

韓愈李十次襄城

分閫救世用

賢豪趙公玉立高歌起

杜

近來廊廟多西帥出相誰言

只在東

楊誠齋送丘宙帥蜀

西蜀宣威百萬兵會須號令自精明

同上京兆從教思廣漢會稽聊喜得方回

東坡送錢穆父守越

古今事實

士服威愛

程務挺以左衛大將軍為單于道安撫大使禦突厥務挺善綏士服其威愛突厥憚不敢寇邊

唐會要

帝稱文武

儀鳳二年詔裴行儉為安撫大食一使歸至京師將吏為刻石碎葉城紀功帝勞曰行儉提孤軍深入萬里兵不血刃叛黨禽夷可謂文武兼備矣

職林

乞赦脅從

狄仁傑字懷英突厥入趙定標掠遁去拜仁傑河北安

撫大使時民多脅從於賊仁傑願曲赦河北一切不問

詔可

同上

許以便宜

馬儉為并州道安撫大使許以便宜

全活饑民

韓魏忠獻王琦益利路人饑為體量安撫使公至則蠲租減稅以募人入粟招募壯者刺以為廂禁軍檄劔門關民流移欲東者勿禁全活饑民百九十萬蜀人曰使

者之來更生我也

體量官吏

范雍充陝西沿邊州軍體量安撫使詔所至察訪邊民利害及體量官吏能否

會要

大修戰陣

錢若水撰劉肅公珙謚議公鎮江陵條上兵少財匱之狀除去詭名虛籍之弊大修部伍戰陣之法且謂襄陽兵戍久屯不歸為不便則立番休之制軍情大悅

大戢驕兵

程明道撰彭思永行狀云河朔謀帥以公鎮高陽時狃於承平治兵者鮮明紀律公為帥方重嚴正犯者頗以兵法從事驕兵大戢

錄問繫囚

咸平三年以翰林學士王欽若為并州道安撫大使知制誥梁顥為陝西路安撫使所使錄問繫囚真宗諭之曰朕觀省風俗尤難其人數日思之無易卿等各宜宣

布德澤使知朕勤恤意

惠愛百姓

張忠定公燾外和內剛臨事有仁者之勇在蜀四年尤著惠愛百姓皆畫像以事後帥李璆贊云公昔在蜀千載一人公今去蜀千百其身願公再來以慰斯民蓋實

錄也

周益公集

到部賑貧

韓康國獻肅公絳字子華江淮兩浙歲饑以公體量安

撫江夏東西二路到部則發倉廩賑貧乏問百姓疾苦

畫策弭盜

宰執奏福建安撫葉夢得措置弭盜之事上曰盜之竊發多緣守令非人培克所致宜令帥司條具凡有害於民者除之自此公或招或捕或誘之相戕三策並用

莫濟

撰葉夢得行狀

畫像立祠

韓魏公所歷諸大鎮皆有遺愛人人畫像事之獨魏人

立生祠為塑像歲時瞻奠比狄梁公戎狄尤畏公名凡使契丹及來使者必問韓侍中安否

言行錄

遮道拜泣

許汾知鄧州兼荆南西路安撫使政尚寬簡務為勸戒而人盡其情庭無留訟盖一本於誠信故人愛服之在鎮四年一路獄空者八十縣鄰路饑流詔公賑濟活二萬六千九百有奇去之日百姓遮道拜泣比之召父杜母而立祠於堂

許龍圖
行狀

卷七
錄諸將功狀

劉忠肅公珙巨寇李金奮起為亂以公為荆湖南路安撫使公入境賊衆已數萬公檄鄰道謹斥堠守隘塞亟奏請下荆襄發卒又遺書制置使沈介請毋須報而亟遣介為遺兵官軍日盛而賊勢日衰於是賊徒執李金以降酋黨盡戮既乃錄諸將之功狀列上不以一毫有所私上嘉歎再三璽書褒美

薦諸將可用

王文忠公堯臣元昊反以公為陝西體量安撫使視四
路山川險易還言某路宜益兵若干某路賊所不到某路
宜急為備至於薦諸將其可用者二十餘人後皆為名將
古今文集

雜著

代裴相公讓河南府道副元帥表

常衮

伏以東征之寄相宅之選皆周召之臣保釐統一也故

二南風化見美詩人況洛邑經陸渾之戎有舊染之俗
賴陛下發皇明以燭之布陽和以煦之流散稍歸傷痍
甫起然猶師居之任宜得經濟之才自河而南至於吳
楚節制戎律半於天下非宏略傑出功冠一時不可以
專五侯九伯之征總衣裳兵車之會臣以衰朽薄劣待
罪台司塵辱尸忝無裨朝政每趨宸陛益愧周行豈謂
殊常之恩屢出非望注意之責并在微軀憂懼慙惶寸
刻難措臣聞惟名與器不可假人審已量力未宜虛授

若貪榮冒寵黽勉苟容神明昭昭必速其害伏望歷求
百辟委之兼才以分二老之任用增九鼎之重則至公
大行羣下知勸無任懇迫之至

辭免知福州安撫狀

真德秀

視邦選侯無越帥藩之重臨人蒞政莫如鄉部之難兼
此寵榮惕焉震懼伏念臣材非敏銳學最空疎兩朝千
載之逢薦誇華顯一節四麾之寄蔑著勞能自撫舊邦
偶承極弊邑有積年之豫借州無旬日之宿儲重以公

姓實蕃廩祿弗繼內循薄技既初無鞭策之長俯眎窮
忙寧忍用箕斂之術輒效求芻之義冒干行輩之仁天
憫皇宗歲頒僧牒獲少寬於憂窘方勉竭於撫摩粗銷
田里之歎愁即丐山林之閒散未能底績遽已饗恩陞
近職於文謨付中權於閩服顧慙謏曷稱褒遷不稼
取禾難逭公言之誚維桑與梓更虞本道之嫌敢瀝忱
辭冀回渙渥

論帥臣不可輕出

樓 鑰

臣竊惟諸道置帥官稱安撫兼兵民之權有分閫之制朝廷選擇甚重不輕比年以來遇有盜賊竊發州縣所不能制者必使帥臣親行雖多成功臣竊慮此水旱饑饉既不能免潢池弄兵安保其無若自此以為故事帥臣動輒臨戎恐非國家之長策也仰惟神宗皇帝垂意邊事廟謨深遠乃熙寧九年知成都府蔡延慶言乞發陝西兵援茂州俟兵集自將以往令轉運司攝府事詔朝廷已遣將部兵延慶務在持重毋得輕去成都元豐

六年河東經略司言西賊入麟州神堂寨知州訾虎等
領兵出戰有功詔虎自今毋得輕易出入遇有寇邊止
令裨將出兵拚逐神宗之慮深矣蓋帥守之臣民之司
命一有失宜衆心易動當令指授方略調度軍食持重
鎮撫以靖一方雖有挫衄根本不搖若使輕出利害實
大蓋帥臣之行建牙郊野堪戰之士咸在行陣從行兵
卒必是單弱而又隨宜遷次登陟險隘脫有點桀之盜
伏隱篁竹乘間捷出以犯大帥之顏行則賊勢日張國

威難振倉卒之頃可勝言哉故延慶有請既拒而不從
訾虎成功亦因以切戒此臣平日之所慮適合信史之
所傳無事而言似非時務愚者一得願效君前伏惟俯
矜微悃曲留宸念臣幸甚

古詩

呈王中丞廬院長

韓愈

聲名動朝闕光寵耀京洛旁午降絲綸中堅擁鼓鐸江
淮永清宴宇宙重開拓印從負鼎假門為登堦鑿再入

更深嚴又逢彌蹇諤宿筵盡狐趙舞騎多衛霍帶垂蒼
玉佩轡盛黃金絡五門氣爭呼六奇心運度

送薛穎叔帥熙河

蘇子瞻

西方猶宿師論將不及我苟無深入計緩帶我亦可我
欲歌杖杜楊柳方婀娜邊風事首虜所得蓋么麼願得
魯連客一射聊城笥

送元厚之帥福州

王介甫

元侯文章翁更以吏能著今為大帥府千里來赴懇街

詔出黎嶺方為遠人慕旌旗滿流水冠蓋東門駐

律詩

聞晉公自蔡州入覲

韓愈

南伐旋師太華東
天書夜到冊元功
將軍舊壓三司貴
相國新兼五等崇

贈淮西賈兵馬使

釋清江

破虜功成百戰場
天書新拜漢中郎
映門旌旆春風起
對客絃歌白日長

送鄧漕移帥揚州二首 周必大

碧幢紅旆擁西風，幾點淮山落眼中。
臥轍正看留使者，褰帷早已識元戎。
兒童騎竹迎并牧，父老封棠記召公。
人望汲卿居禁闥，淮陽只恐又匆匆。

聞道維揚地望雄，風流人物似江東。
六龍前日臨淮海，五馬由來說醉翁。
壁月幾橋留夜色，珠簾十里待春風。
遙知九日平山會，笑插茱萸滿鬢紅。

留別金陵韓帥 周必大

仲通二首

十二麟符玉截肪
腰間仍映帶圍黃
化行江國春常早
一息階除日自長
槐影緩趨三接晝
棠陰先滿十連堂
子淵去踏長安道
待賦中和奏未央

再展賓筵又一期
千金敝帚賴提撕
泮宮正采僖侯藻
太學俄甘吏部齏
人似塞鴻春向北
心隨江水日潮西
太平勲業須公助
不用頻年戀節犀

送廣帥秩滿之官丹陽

楊廷秀

北門臥護要耆英
小試胸中十萬兵
天借金山冷落月

身兼鐵甕作長城何知嶺上因歸路摘取梅酸去作羹
已有紫泥教詣闕便應留住付鈞衡

送朱師古龍圖少卿帥潼川 楊廷秀

壁水蓬山徧羽儀頌臺公府更光輝紫荷到眼垂持橐
黃菊關心便拂衣鬻子運籌年尚少買臣衣繡日思歸
少煩諭蜀須還報却袖香烟侍太微

餞洪帥張伯子移鎮京口 楊廷秀

夢入飛雲卷雨簾袖却築巖作霖手滕王閣上唐阿舒

春生秋殺震江湖吏部未見張尚書春生儘有秋殺無
江西十州百萬戶父非姓召母非杜

餞趙子直出帥益州

楊廷秀

欽水花潭照碧油西清學士舊鰲頭隨身琴鶴如清獻
治蜀功名更蜀侯

送趙德老端明帥蜀

樓 鑰

身名俱泰老尚書叱馭寧辭萬里途兩地恩榮真赫奕
四川父老定歡呼車崖袍帶今重見清獻琴龜我更無

頻向籌邊樓上望歸來方略上新圖

送溫州

蘇子瞻

威聲又數中興年二虜行當一矢聯聞道名城得真將
故應驚羽落空弦追鋒歸去雄三衛授鉞重來定十連

送福建張比部

王介甫

畫船簫鼓出都時萬里驚人去不追却望塵沙應駐節
會逢山水即吟詩

贈馮揚帥

楊次公

天下無雙士淮南第一州文章老元帥節鉞古諸侯
路穩歸黃閣功成建碧油風雲生鷁首蛟蜃怯龍頭

和送朔方大總管

李嶠

玉塞征驕子金符命老臣三軍張武旆萬衆餞行輪
猛氣凌玄朔崇恩降紫宸投醪還約士辭第本忘身
露下鷹方擊風高雁欲賓方銷北塞祲還靜漠南塵

送嚴黃門再鎮蜀川

岑參

授鉞辭金殿承恩戀玉墀登壇漢主用有德蜀人思

送李中丞赴商州

韓翃

當年紫髯將他日黑頭公不異金吾寵兼齊玉帳雄

上河陽李大夫

蘇子瞻

上將秉神略至兵無血威寒劍奪衆景夜星火長輝武
牢鎖天關河橋紐地機

經略使

歷代沿革唐貞觀二年邊州別置經略使此蓋使名之
起節度兼度支營田招討經略使則有副使判官各一

人儀鳳二年以黑齒常之為河源軍經略大使永淳元年婁師德為河源軍經略副使至德三年賀蘭進明除嶺南五府經略兼節度使建中元年除元琇節度始不帶五府宋不常置咸平五年始以右僕射張齊賢為邠寧環慶路經略使判汾州諸路軍馬並受節度又以鄧州觀察使錢若水為并代經略使判并州自後不除人寶元中夏人入寇始命陝西沿邊大將皆兼經略皇祐間儂智高擾邊詔知廣桂州並帶經略安撫使故後西

南二邊常帶經略所以重帥權而服羗夷也其經略安撫各以直秘閣以上充掌一路兵民之事皆帥其屬而聽其獄訟頒其禁令定其賞罰稽其錢穀甲械出納之名籍而行以法若事難專決則具可否稟奏即于機速邊防及士卒抵罪則聽以便宜裁斷帥臣任河東陝西嶺南路職任綏御戎夷則為經略安撫使南渡之初依舊制廣南東路帶主管經略安撫司公事西路帶經略安撫使紹興五年令襄陽守臣湖北帥帶經略安撫使後

罷而二廣如故元經略使正三品副使從四品經歷七

品

詩句英英桂林伯實惟文武才

韓愈

二十四州民樂否莫

教一物怨窮途

張孝祥

紅旗照海壓南荒徵入中臺作侍

郎

韓退之贈刑部馬侍郎

斧鉞下青冥樓船過洞庭北風隨爽氣

南斗避文星

杜甫送李大夫赴廣州

古今事實

威名流聞

戴叔倫為容管經略使綏徠夷落威名流聞其治清明
仁恕多方略所至稱最德宗嘗賦中和節詩遣使者寵

賜

唐職
林

威聲風行

唐裴行立為安南經略使威聲風行

綏定八州

唐元結為容管經略使自諭蠻豪綏定八州民樂其教

立石頌德

都督諸軍

元和十二年御史中丞裴公來蒞茲邦都督二十七州

諸軍州事盜息奸革德惠敷施期年政成

柳子厚桂州賀家淵亭記

管嶺外地

唐涼公房為涼州經略管嶺外十三州之地稅節賦時
公私有餘削衣貶食不立資遺以班親舊為友為義

平嶺表夷

唐王雄字宏肱大厯中為容管經略使平嶺表夷獠代

宗遣使慰勞加金紫光祿大夫

職林

恩被異域

宋朝余襄公帥二廣幾十年恩信被於異域如交趾大理特磨南詔之國皆可以頤指氣使公之文武之才可

謂具矣

言行錄

德著夷夏

范文正公帥邠延涇慶四都恩德著聞夷夏聳服熟戶

蕃部率稱曰龍圖老子至於元昊亦以此呼之

澠水燕談

外蕃貢珍

徐申字維降為容管經略使黃洞納質供賦不敢桀外
蕃歲以珠璣瑁香文犀浮海至申於常賦外未嘗賸索

商賈饒益

職林

寇攘順化

張公師為安南經略使自為吏習於海邦去之則夷獠
稱亂復至則寇攘順化及受命專征牧人盡區處之方
制國備形體之法道阻而備百貨地偏而具五穀儲峙

委積師旅無庚癸之呼繕完板榦控帶兼戊己之位皆
用周禮率由漢儀易野之守險逾丘陵而萬世無虞奇珍
良貨溢於王府殊俗異類盈於藁街優詔累旌其忠良
太史嗣書其功烈

唐職林

築城據要

范文正公為環慶路經略安撫招討使於延州築青澗
城墾營田復永平廢寨熟羌歸業數萬戶於慶州城大
順以據要害奪賊地而耕之又城細腰胡蘆於是明珠

滅藏大族皆去賊為中國用

言行錄

弛禁通輸

劉徽猷子羽字彥修宣撫司移軍閬州吳玠戍河池王彥成金州二鎮皆饑而興元帥過為守備閉關塞褒斜二鎮病之公乃承制拜公利路經略兼知興元府公至之日盡弛其禁民饑通商輸粟二鎮乃安

言行錄

麾兵血戰

范仲淹知慶州兼經略招討使未幾賊兵三萬叩城仲

淹麾兵血戰賊奔而北久之种世衡不利於定州以仲淹晝夜為領兵援初關人心搖動及見仲淹耀兵號令嚴兵威震戎落人心遂安相賀曰邊上自有龍圖公為長城吾屬何憂

究馬利病

張敬夫經略安撫廣南西路朝廷買馬橫山歲久弊積邊氓告病而馬不時至公究馬利病得六十餘條皆有以窮其根穴而事為之防由是諸蠻感悅爭以善馬來

歲額率常先期以辦

朱晦菴集

移檄交趾

余襄公靖字安道嘉祐五年交趾寇邕州殺五巡檢驛
召公以為廣西體量安撫使公至則移檄交趾召其臣
費嘉祐詰責之嘉祐惶恐對曰種落犯邊罪當死願留
取首惡以獻即械送五人送欽州斬於界上

言行錄

移文諭蜀

唐質肅公介知太原府河東經略使至則首戒邊將毋

生事初代州岢嵐軍虜數擾邊公遣兵撤其境上堡柵
又移文諭以利害嚴守以待之遂不復敢動

元昊欽畏

鄭戢字天休為陝西經略安撫招討使巡邊至鎮戎軍
趣蓮花堡元昊方擁兵近塞謂其下曰我已遣人使稱
臣朝廷何為復用此公護諸將其欽畏如此

東都
事略

蠻酋叩謝

李浩公字德遠為廣南西路帥有入對論擇帥事者上

欣然顧之曰如廣西朕已得人矣李浩也公至鎮勤於民事郡舊有靈渠通漕運溉田甚廣歲頗湮塞公命疏治之民賴其利邕管所領羈縻安平州蠻酋恃險凶橫聚兵謀為邊患公遣單使開心見誠諭以禍福即日叩頭謝過焚撤水柵受約束

曾季狸撰李殿撰浩行狀

驚賊破膽

范仲淹與韓琦叶謀必欲外復靈夏橫山之地邊上評曰軍中有一韓西賊聞之心膽寒軍中有一范西賊聞

之驚破膽元昊大懼遂稱臣

名臣傳

得人死力

唐劉雍為隴右經略使輕財愛士得人之死力

簡閱州兵

南軒先生張栻經略安撫廣南西路所統州二十有五
遼寬荒殘故多盜賊徼外蠻夷間亦入塞為暴而州兵
皆脆弱慵惰又乏糧食死亡輒不補公為之簡閱州兵
汰冗補闕籍諸州掠卒伉健者以為效用合親兵摧鋒

等軍日習而月按之視諸州有不足於糧賜若戈甲之費者更許漕司鹽本羨錢以佐之傳令溪洞酋豪諭弭盜睦鄰毋得輒相仇殺生事而他所以立恩信謹闕防亦無不備於是境內肅清方外柔服幕府無南鄉之慮

矣
晦菴文

節制諸司

予為廊延經略使日新一廳謂之五司廳延州正廳乃都督廳治延州事五司廳治廊延路軍事如唐之使忠

五司者經略安撫總管節度觀察處置五使今節度之職多歸總管司觀察歸安撫司處置歸經略司其節度觀察兩案并支掌惟判官今皆治州事而已經略安撫司不置佐官以帥權不可不專都總管副總管鈐轄都監同簽書而下皆受經略節制

沈括筆談

祖於瓊林

咸平四年以兵部尚書張齊賢充涇原儀渭邠寧環慶廊延州保安鎮戎渭遠軍安撫經略使知制誥梁顥副

之帝以邊將玩寇朔方糧道艱阻故命齊賢等使焉即
命發日馳騎而往仍命宣徽南院使周瑩祖於瓊林苑
歸裝無南物

李殿撰浩為廣南西路帥奉法循已律已甚嚴自嶺右
歸裝無南物

歸不載南物

余靖知廣州廣之番舶裝船舊皆取稅公奏罷之以徠
遠商又請立法戒當任官吏不得市南藥及公北歸不

金史卷之七
載南物

古今文集

雜著

桂州新城記

王介甫

儂智高反南方出入十有三州而十有二州之守吏或死或不死而無一人能守其州者豈其材皆不足歟蓋夫城郭之不設兵甲之不戒雖有智勇猶不能勝一日之變也天子於是遂推選士大夫所論以為能者付之

經略而今尚書工部侍郎余公掌廣西馬寇平之明年
蠻越接和乃治城桂州以至和元年八月始作而以二
年之六月成夫其為役亦大矣蓋公之信於民也久而
費之欲以衛其財勞之欲以休其力以故為是有大費
與大勞而人莫或以為勤也故文王之起也有四夷之
難則城於朔方而以南仲宣王之起也有諸侯之患則
城於東方而以仲山甫此二臣之德懃於其君於其為
國之本末與其所先後可謂知之矣慮之以悄悄之勞

而發之以赫赫之名乘之以翼翼之勤而續之以明明之功蓋其君臣如此而守衛之有其具也今余公亦以文武之材當明天子承平日久於補弊立廢之時鎮撫一方修捍其民其勤於今與周之南仲仲山甫蓋等矣是宜有記也

律詩

送張子智移帥入桂

楊廷秀

龍尾名臣進寶奎虎頭移鎮赴榕溪握刀將帥迎牙纛

解辦戎蠻貢象犀
翠浪玉虹餘昨夢
碧簪羅帶入新題
鳳池雞樹公棲處
早個雲飛不要梯

送鄭權尚書南海

王建

城頭龍腦鋪關口
象牙堆物設薰爐
出蠻辭晚節開市
喧山賊破金賤海
船來白氍家家織
紅蕉處處栽已將
身報國莫起望鄉臺

送桂州嚴大夫

韓愈

蒼蒼森八桂茲地在湘南
江作青羅帶山如碧玉簪
戶

多輸翠羽家自種黃柑遠勝登仙去飛鸞不假驂

送鄭尚書赴南海

韓愈

衙時龍戶集上日馬人來風靜鷄鵠去官廉蚌蛤回貨
通獅子國樂奏越王臺事事皆殊異無嫌屈大才

送嚴大夫赴桂州

白居易

地壓坤方重官兼憲府雄桂林無瘴氣栢省有清風山
水衙門外旌旗艤艫中大夫應絕席詩酒更誰同

送徐大夫赴廣州

劉長卿

上將壇場拜南荒羽檄招遠方來百越元老事三朝霧
遶龍川暗山連象郡遙

送鄭尚書出鎮南海

張籍

牙旆從城展兵符到府開蠻聲吟夜市海色潤朝臺

送李大夫赴廣州

杜甫

斧鉞下青冥樓船過洞庭北風隨爽氣南斗避文星

寄陽桂州

杜甫

五嶺皆炎熱宜人獨桂林梅花萬里外雪片一冬深

送鄭尚書赴南海

韓愈

番禺軍府盛欲說暫停杯蓋海旌旗出連天觀閣開

送嚴大夫

王建

嶺頭分界堠一半屬湘潭水驛門旗出山蠻洞主參

送范經略仲濟

蘇軾

廟堂選世將范氏真名賢仁風被宿麥綠浪搖秦川

留守

歷代沿革漢和帝南巡張禹以太尉兼衛尉留守隋大

業九年代王侑留守西京十二年李淵太原留守王威
高君雅為副唐太宗貞觀十七年親征遼東置京城留
守以房玄齡充蕭瑀為副其後車駕不在京都則置留
守以金吾大將為副咸亨二年高宗幸洛陽以雍州長
史李晦為西京留守其後車駕發京都則置留守以右
金吾大將軍為副留守太原府亦置尹及少尹以尹為
留守少尹為副留守謂之三都留守五代晉天福七年
勅留守之任委寄非輕凡降絲綸宜同將相今後除留

守宜降麻制留守降麻自安彥威始宋天子巡狩親征則命親王或大臣總留守事建隆元年親征澤潞以樞密使吳延祚為東京留守其西南北京留守各一人江南應天府尹各一人留守尹闕則置知副府事一人以郎中以上充通判各二人一掌留守一掌府事以朝官充留守司掌宮鑰及京城守衛修葺彈壓之事畿內錢穀兵民之政建炎初京城有副留守

以檢校少傅寧武軍節度使范訥充

留守以侍衛親軍都指揮使遂安軍承宣使郭仲荀副之

又有西京留守並係執政

從臣充兼節制軍馬其後武林建鄴並建行宮留守從

權措置百司事務六年有行宮同留守

以左通奉大夫孟庾提舉萬壽

觀兼侍讀充

詔二留守並權赴尚書省治事

是年八月三省已降指揮三省

樞密院常程事務並聽行宮留守司與決並權赴尚書省治事

元有兩都留守同知留

守副留守

羣書要語山國用虎節

周禮

秦使杞子戍鄭掌北門之管

傳

謹守管鑰

漢蕭何

房喬居守聖君無回顧之憂

類要

明皇

東守命開府以居留

同上

方委留鎮

白集韓皋留守制

主鑰東門

杜牧之集 命爾居守俾之保綏陸集賈耽制 統禦都邑提持紀綱

同乃眷留都之重歐公除劉沈制 委以別京之重文彥博制 處居留

之任賜彥博口宣 守宮鑰之謹嚴文彥博謝表 眷是別都之重溫公

賜韓琦詔 近付京都之鑰荆公除李韓制

古今事實

別造玉符

傳符之制京都留守曰麟符隋煬帝幸遼東命樊子蓋東都留守屬楊玄感作逆攻城子蓋備禦有功車駕至

高陽追詣行在所帝勞之比蕭何寇恂且謂曰公宜持
重戈甲五百人而後出此亦勇夫重閉之義無賴不軌
者便誅鋤之凡可施行無勞形迹今為公別造玉麟符
以代銅獸典六

乃賜鐵券

郭子儀為京城留守自變生倉卒賴子儀復安帝曰子
儀固社稷臣因勞曰用卿晚故至此乃賜鐵券圖形凌

烟閣

唐職林

臥總留臺

貞觀中太宗幸玉華宮房玄齡以疾臥總留臺

並加持節

後魏高祖南伐以太尉元丕廣陵王羽留守京師並加持節

宜降絲綸

見沿革注

必賜旗甲

唐元和九年以尚書左丞呂元膺為東都留守舊制命

留守必賜旗甲與方鎮略同及元膺受任終無所賜朝
論以東有寇虞特用元膺不當削其儀制以阻威望諫
官上疏曰華汝壽三州列賜戎械居守之重固宜寵借
憲宗曰此數處並不當與其後遂皆停

付六府事

隋楊瓚居守帝謂之曰六府事殷一以相付朕將遂事

東方無西顧之憂

職官
分紀

治綠野堂

裴度字中立文宗時留守東都時閹豎擅威權天子擁
虛器度不復有經濟意乃治東都綠野堂野服蕭散為
之把酒不問人間事帝知度神明不衰每人自洛來必
問度安否

國之元老

唐玄宗東巡宋璟為留守上臨發謂璟曰卿國之元老
為朕股肱耳目今將巡洛邑為別歷時所有嘉謀嘉猷
宜相告也璟因極言得失特賜綵絹等仍手制曰所進

言書之坐右出入觀省以誠終身其見重如此

民號良吏

顧少連字夷仲為東都留守表閒田以利民號良吏

任關中事

漢與諸侯擊楚蕭何守關中以便宜施行上來以聞計
戶轉漕給軍漢王數失軍遂去何常興關中卒輒補缺
上以此刺屬任何關中事

漢蕭何傳

無西顧憂

光武曰昔高祖任蕭何於關東無復西顧之憂得專征
山東終成大業

治尚寬簡

源乾曜留守京師治尚寬簡人安之

治以和簡

權德輿治以和簡人以寧便

戎政歡服

劉政武德初留守太原調輯戎政遠近歡服

號令精明

王翊字宏肱為東都留守既至開田二千餘屯修器械
皆良金壽革練士卒號令精明吳少誠叛獨東畿為有
備

罷守失望

裴度罷東都留守中人使幽鎮還言軍中謂度在朝而
兩河諸侯忠者懷强者畏今居東人人失望

宗社獲安

荀植留守京師掩獲沙門法秀謀反太后曰宗社獲安
實卿之功

倉卒復安

郭子儀射生將王撫自署京兆尹亂京城子儀斬以徇
帝以子儀為京城留守自變生倉卒賴子儀復安

賜書褒勞

杜暹帝東幸以暹為留守暹率當番衛士繕三宮城浚
池督役不少懈帝數賜書褒勞

賜詔寵異

開成中東都留守牛僧孺徵拜左僕射上令左軍副使
賁告身宣賜舊例留守入朝無中使賜詔上特寵異之

唐會
要

行留悉總

房玄齡為相會伐遼留守京師詔曰公當蕭何之任朕
無西顧之憂凡糧械飛輸行留悉裁總之

治行第一

張延賞為東都留守五年治行第一

或用舊德

唐故事居守之任或用舊德或用故相未嘗以武將而當保釐之重長慶二年以浚郊有事地逼封圻以前義武軍節度使陳楚為東都留守且非舊制尋亦改焉

續通

典

可倚大事

太宗幸洛陽李大亮副房玄齡居守玄齡稱有王陵周

勃節可倚大事

有利即行

高宗幸洛陽令河間王孝恭次子晦居守顧曰關中之事一以付卿令式之外有利於人者隨事即行不須聞奏晦累有異績

久廢復行

崔從實歷初為東都留守故事留司官入宮城門列晨衙見留守吏誕謾久廢至是復行

團結民兵

國朝葉夢得字少蘊

號石林先生

公留守建康團結沿江民

兵數萬至是呼集分據江津仍遣其內機宜官模領數
千人守馬家渡敵果遣吾叛將酈瓊以輕兵來犯覺有
備而去

言行錄

位置營壘

洪文安公遵知建康徧走郊野位置營壘民居及塚墓
無相涉諸將不能易上賜手札曰寨地異同卿挺身任

責非乃心王室疇克爾

全活數十

王沂國文正公曾留守洛陽屬歲歉里有囤積者饑者聚黨脅取鄰郡以強盜論公但重笞而釋之遠近聞以為法全活數十計

並同上

條具十事

公知建康府赴闕奏事建康東南巨鎮南渡以來行宮在焉兼掌留鑰選用尤重公對於內殿敷陳時務當先

定其規模為不可勝以待敵之可勝又條具十事上嘉

納之

鄭克撰呂尚書社行狀

輦下清肅

李沆字太初謚文靖真宗朝戎人寇邊幸鄴沆以宰臣為東京留守不戮一人而輦下清肅

城上親督

劉錡領兵赴東京副留守任抵順昌府得報敵已陷東京公曰基本赴留司今東京既陷幸全軍至此有城池

可守當同心力以死報國公親於城上督衆設戰具凡六日而敵至公遣擊之頗殺敵衆既而烏珠親擁兵至公登城會諸將問策或謂宜具舟全師而歸公曰朝廷養兵正欲為緩急之用况已挫敵鋒軍聲稍振雖多寡不侔然有進無退公遣數百人出西門敵來接戰俄以數千人出南門士殊死鬪敵大敗橫屍盈野敵拔寨遁

去

言行錄

畫像以事

王沂公再蒞大名治政益信於俗民居軍伍咸畫像以
事之時北使每往復入境皆云此府王公在焉必沐浴
潔服後入

捧縑以賜

范成大淳熙中帥江東兼行宮留守陞辭詔明日辭選
德殿特設几開宴酒三行命侍行過西小軒曰此朕清
坐處也再坐上曰勸卿一杯且有以為侑公飲訖二內
侍捧縑素來上有石湖二大字拜賜進謝上為滿引復

袖御書蘇軾詩一軸以賜

聘使書名

韓魏公鎮北門北門為聘使道舊與京尹書皆押字不
名及公留守則名子書其副使成禹錫來仍喻來介曰
以侍中在此故特名及公去後留守引前比欲得其名
強之不可

社稷所重

景德元年駕幸澶淵真宗謂王旦曰京師社稷所重非

公不可

並同上

特許行留

紹興六年中書門下省言秦檜孟庾並係兼行宮留守
詔特賜張蓋

長於彈壓

紹興八年召呂頤浩付以建康頤浩入辭趙鼎曰頤浩
之政長於彈壓建康名郡頗望其來上曰繁劇固以彈
壓為先若不動聲色使百姓陰受其賜小人却不知也

中興系
年錄

古今文集

律詩

寄北都留守裴令公

白居易

天上中台正人間一品高休明值堯舜勲業過蕭曹始
擅文三捷終兼武六韜動人名赫赫憂國意忉忉寵重
移宮鑰恩新換閫旄保釐東宅靜守護北門牢豹尾交
牙戟虬髯捧佩刀通天白犀帶照地帶麟袍

送裴司徒令留守太原 劉禹錫

星使出關東兵符賜上公
山河歸舊國管鑰煥離宮
行色旌旗動軍聲鼓角雄
愛棠餘故吏騎竹見新童
漢壘三秋靜胡沙萬里空
其如天下望旦夕詠清風

寄東都留守令狐相公 姚合

除書東守洛陽宮恩比藩方任更雄
拜表出時傳七刻排班衙日有三公
旌旗嚴動臨關外侍府洪深接禁中

送薛尚書兼御史大夫東都留守

耿 漳

副國威名重春卿禮樂崇賜珪推拜下分命遂居東高
旆翻秋日清饒自細風教用儒門雅兵稱武庫雄誰云
千載後周呂獨為公

詩話

趙老燈臺

歸田錄俚諺云趙老送燈臺一去更不來不知是何等
語雖士大夫亦往往道之天聖中有尚書郎趙世長者

常以滑稽自負其老也求為西京留臺御史有輕薄子
送以詩云此回真是送燈臺世長深惡之亦以不能酬
酢為恨其後竟卒於留臺

春圃桔槔

熙寧初魏公罷相守北京新進多陵慢之魏公鬱鬱不
得志嘗為詩曰花去曉叢蜂蝶亂雨勻春圃桔槔閒時
人稱其微婉

古今事文類聚外集卷七

欽定四庫全書

古今事文類聚外集卷八

元 富大用 編

諸使司部

提刑按察使

歷代沿革唐貞觀初遣大使十三人巡省天下諸州水
旱則有巡察安撫之名神龍二年以五品已上二十人
為十道巡察使按舉州縣再周而代景雲二年置十道

按察使每道各一人開元二年改曰十道按察採訪處
置使四年罷八年復置十道按察使二十年改曰採訪
使分十五道二十五年命諸道採訪使考課官吏善績
三年一奏永為常式天寶末又兼黜陟使乾元元年改
曰觀察處置使宋開寶五年遣常參官四人分詣諸路
相度田土苗稼點檢採訪公事九年遣和峴江南道採
訪淳化二年諸路轉運司置提點刑獄景德中始置諸
路提點刑獄公事以朝臣充掌察所部疑留獄訟勸課

農桑而按其官吏之不法者慶厯三年詔諸路轉運使
並兼按察使每歲具官吏能否六年罷之熙寧中嘗遣
使採訪紹聖中詔三歲一遣郎中御史按察諸路監司
元各道置提刑按察使有副使簽書公事為之貳又置
經歷知事等員至元二十八年改肅政廉訪使

羣書要語汝陳時臬事

書

用告爾祥刑

上同

奉茲星使採

訪風謠

六帖

周適四方巡行風俗漢分八使觀採方言

上同

勤宣帝命數求人瘼

上同

今雖遣大夫循行風俗銜命糾

案以黜陟為名揚虎視之威厲秋鷹之爪

華嚴表

詩句願君五袴手報此米粟魂一見刺史天稍忘獄吏

尊

東坡送黃師彥赴兩浙憲

嚴能喜劇部持節按祥刑

山谷

名節自天

回使節郎星朝斗作台星

楊誠齋

使星移照天星去白鷺青

原遮不住

同上

憲臺師表光且耿濂溪留下濂溪井

云

云

陽春有脚來江城銀漢乘槎移使星嶺上梅花莫遲發

先遣一枝迎玉節

同上

方丈蓬萊第一人星軺玉節正青

春

同上

却從吾州奪吾侯一州奪與三十州梅花一笑迎

漢節桂花八株吹嶺雪使星歸去作台星超過郎星與

月卿

同上

古今事實

繡衣使者

暴勝之為直指使者衣繡持斧以出討盜賊

漢書

朱衣前導

舊制兩省客出使得朱衣吏前導

唐職林

捕督盜賊

熙寧十年以丁執禮為河北西路提刑使上諭之曰卿職在刑獄盜賊最急宜用捕督盜賊

平反獄訟

高賦言國家置提刑司蓋欲平反獄訟使民不冤

詳見檢法

門

洗冤澤民

濂溪先生周敦頤提點廣東刑獄不憚出入之勤瘴毒之侵雖荒崖絕島人跡所不至處亦必緩視徐核以洗

冤澤民為已任

淵源錄

訊獄活囚

馬亮徙福建提刑獄亮至部覆訊冤獄全活者數千人

仁宗

實錄

諭民作詩

何耕字道大除潼川提刑諭民作詩四十二篇語平易而教化寓焉郡邑家有其書強暴犯法父老必譙曰汝不誦何公詩乎往往知悔而民即無訟獄矣

周益公集

諭盜原罪

元祐中蔡挺起知南安軍擢江西提點刑獄時盜賊為江西福建八州之患挺告諭所部私諭藏器甲與其首納原其罪所得兵械以萬計於是盜賊始衰

東都事略

立榜伸冤

公先提點荆湖北路刑獄衡人思之繪公像建祠於城東青草寺再使湖北先聲入境而奸吏望風解印綬者數十人按部所至立大榜於前云久負抑冤州縣不理

者立其下於是積年無告之冤咸得伸雪

瀘溪先生王庭珪撰向子

狀
志行

諭囚獲罪

鄭丙為廣西提點刑獄歸正沙世堅素武勇坐賊決配
靜江公時為憲部有劇賊未獲公諭世堅立功贖過世
堅馘渠魁以獻

閱兵止奸

呂居簡擢提點京東刑獄徐州人有告孔直溫等挾妖

法誘軍士為變而運使不受理者居簡亟令改狀合巡尉捕其黨誅之詔遷一官已而濮州復有叛者民相挺驚潰居簡馳往得其首惡誅之因大閱兵饗士奸不得

發詔又遷一官

神宗實錄

收舉贓罪

順帝選有盛名周舉杜喬樂巴張綱等分行天下刺史二千石有贓罪顯明者驛馬上之墨綬已下使輒收舉

布宣德澤

裴度以司封員外郎知制誥田弘正效魏博六州於朝
憲宗遣度宣諭弘正知度為帝高選故郊迎受命且請
徧至屬州布宣天子德澤魏人歡服還拜中書舍人

往使建節

司馬相如建節往使蜀太守以下郊迎縣令負弩先驅
所過畫圖

李詢拜侍御史持節使幽州慰撫北狄所過皆圖山川
屯田聚落百餘卷悉奏之

使民歸本

李襲譽擢江南巡察大使多所黜陟揚州江吳大都會俗喜商賈不事農襲譽為引雷陂水築勾城塘溉田八

百頃以盡地利民多歸本

唐本傳

禁民淫祠

狄仁傑為江南巡撫使吳楚俗多淫祠仁傑盡禁止止

留夏禹吳太伯季札伍員四祠

唐本傳

循行天下

漢元帝詔臨遣光祿大夫王褒等十二人循行天下

注臨

遣謂臨面而約敕遣之

又武帝遣博士循行天下舉獨行君子士

有特招使者之任也

巡視州縣

張廷珪請復十道使巡視州縣帝然納之因詔陸象先等分使十道

宣布聖德

立春遣使者循行風俗宣布聖德存恤孤寡問民所勞

苦咸宣傳

覽觀風俗

王莽遣使者分行天下覽觀風俗

王莽傳

處決平恕

唐馬懷柔以十道使黜陟江西處決平恕

多振冤滯

劉詳道詔巡察關內道多振冤滯

發粟賑貧

武帝時河內失火使黯往視之黯曰不足憂臣過河內
河內貧人傷水旱萬餘家臣謹以便宜持節發河內倉
粟以賑貧民請歸節伏矯制罪

持節承制

王莽遣使持節承制乘傳使者經歷郡國日且千輩

持節勞徠

唐貞元八年州縣大水權德輿建言宜選羣臣明識通
方者持節勞徠

勞問循慰

貞元八年奚陟遷中書舍人江南淮西皆大水詔陟勞問循慰所至人人便安

振贍流民

孔光為博士數使錄冤獄行風俗振贍流民奉使稱旨由是知名

繩糾吏治

韋見素天寶五載為江西山南黔中嶺南黜陟使繩糾

吏治所至震畏

分道賑贍

劉思立在高宗時為名御史時河陽大旱詔遣御史中丞崔諲等分道賑贍思立言蠶務未畢而遣使撫巡所至不能無勞擾

巡邊請行

程昇同平章事明年西北軍政不治議置巡邊使憲宗問孰可者乃自請行

持節行郡國

漢昭帝始元元年遣王平等五人持節行郡國舉賢良問民所疾苦冤失職者

持節詔郡國

宣帝始立遣使者持節詔郡國二十石謹牧養而風德化

陸贄陳五術

陸贄補渭南尉德宗立遣黜陟使十一人行天下贄說

使者請以五術察風俗聽謠須審其哀樂納市賈觀其
好惡訊簿書考其爭訟覽車服等其儉奢省作業察其
趣舍

子昂對三事

唐陳子昂對三事一言九道出大使巡按天下申黜陟
求民瘼臣謂計有未盡也且陛下發使必欲使百姓知
天子夙夜憂勤羣臣知考績而任之也好暴不逞知將
除之也則莫若擇仁可恤孤明可振滯剛不避強禦智



足以照奸者為使故輜軒未動而天下翹待今使未出
道路之人皆已指笑欲望進賢退不肖豈可得耶

古今文集

雜著

八使出巡賦

張友正

明明漢皇文物昭彰順帝以化俾人從康將欲敷聖政
舉皇綱乃分國之八使而宣命於四方八使伊何朝中
之善將假其權尤難其選稱直指而獨立歌皇華而分

遣繡衣既盛於新儀四牡載光於古典當官而行受命
無忝善微毫而必舉惡纖芥而必貶舉善兮必尋其清
流之源貶惡兮必去其阿諛之諂或負官闕之厚援不
顧城社之微託無具薰燒不經繒繳豺狼之毒懷梟
獍之惡徑持斧而前進歛下鞫而直搏誓將去大憝而
拔盤根安問狐狸之與鳥雀其有銳心公器勗力王室
知賢才而能進察奸佞而能黜必將上聞於天子寧俟
於終日道之不憊人亦焉廋操利劍而剗其固懸明鏡

而燭其幽使乎使乎萬方觀德天下之治也賢者當其
權天下之亂也不肖居其職求訛偽之訟採妖艷之色
方直者於以退藏阿諛者由是登陟可謂之治也歟適
足以亂其國我國家統紀有經超古作程企虞典之考
績法漢家之分行舉八元而普天輯睦按十道而攬轡
澄清太階既平君聖臣明豈待久於其道而後天下化
成

古詩

送蔡定夫使廣東

楊廷秀

國朝以來妙人物近世獨數乾道年后皇乃武再開關
欲傾東海洗坤乾九淵探珠巖採璞天地為網置羣賢
玉堂金鉉貯稷契蓬山壁水俱崔班追還慶厯元祐初
突過貞觀開元前麟臺正字蔡夫子乃祖元是四諫官
風流文采已碧梧忠義慷慨仍青氈折檻舊痕故無恙
后皇是日動龍顏嚴霜烈日照鵷鷺一身似葉飄淮壖
柴門僵臥三臘雪魚釜僅續一線煙后皇九重念五嶺

生愁雨露南方乾詔謂正字當居中肯為朕行綏百蠻
梅花迎笑錦囊古南斗退避文星寒動搖山岳細事耳
約束海若收波瀾坐令百姓萬里外墮在二陝三輔間
檳榔紅時乏泥紫歸來徑著侍臣冠我家江西更西處
白鷺洲對青原山公歸肯訪老翁否酤酒滿眼未必然
青芻白飯聊隨緣

律詩

送許覺之奉使東川

王介甫

三秋不見每惓惓握手山林復悵然後會敢期黃耆日
相看且度白雞年畏塗石棧王尊馭榮路金門祖逖鞭
一代官儀新藻拂得瞻宸宇想留連

送劉和父奉使江南

王介甫

劉郎今日擁旌麾傳到江南喜可知上冢還須擊羊豕
下車應不問狐狸無人敢勸公榮酒為我聊尋逸少池
亦見嶺頭花爛漫更將春色寄相思

送洪使君

劉克莊

雖擁朱幡貴清臞兩鬢霜判花人競誦詩草士深藏農
飽因蠲賦州貧為捄荒公歸無媿面應可見嚴光

和李侍御奉使

孟浩然

南紀西江濶皇華御史雄截流寧假楫掛席自生風寮
案爭攀鷁魚龍亦避驄坐聞白雲唱翻入棹歌中

送崔郎中往使西川行在 韋莊

拜書辭玉帳萬里劍關長新馬杏花色綠袍春草香一
身朝玉陛幾日過銅梁莫戀爐邊醉仙宮待侍郎

送張天覺使河東

孔常甫

曾立玉墀聯近侍
新持金節領諸侯
屠龍伎倆終須用
探虎功名未肯休

酬裴司空

韓退之

銜命山河撫亂師
日馳三百自嫌遲
風霜滿面無人識
何處如今更有詩

奉使京西

李涉

盧龍已復兩河平
烽火樓邊處處耕
何事書生走羸馬

金史卷八
原州城下又添兵

奉使鄂渚

滄洲不復戀魚竿
白髮那堪帶鐵冠
客路向南何處是
蘆花千里雪漫漫

送崔員外使回入京

陸暢

六宮星裏一星歸
行到金鉤近紫微
侍史別來經歲月
今宵應夢護香衣

奉和聖製送十道採訪使及期集使

張九齡

三年一上計萬國趨河洛首路迴竹符分鎮揚木鐸昭
晰動天文殷勤在人瘼

送期集使

王維

玉乘迎天客金節送諸侯祖席傾三省褰帷向九州

送顧子敏使河朔

韓退之

金人勒燕然廊廟登劍履翻然西河朔坐念東都水

奉使常山呈副使

朗朗聞街鼓晨起似朝時翻翻走驛馬春盡是歸期

送王李德提刑

楊廷秀

寶儲依舊接英游蕩節何曾遠藻旒卿月使星銀漢曉
繡衣綵服太湖秋

轉運使

歷代沿革唐先天二年李傑始為水陸發運使運使之
名起此開元二十一年裴耀卿以侍中充江南淮南轉
運使而崔希逸蕭旻為副使副使始此天寶以韋堅充勾

當轉運使第五琦充諸色轉運使劉晏充諸道轉運使
其後韓滉杜棕杜讓能崔昭緯皆以宰相充使而諸道
分置巡院皆統於此五代罷巡院始置轉運使宋藝祖
開基懲五季之亂藩臣擅有財賦不歸王府自乾德以
後僭偽略平始置諸道轉運使以總利權開寶六年廣
南平除徐澤為判官蓋轉運判官始此其轉運使之名
國初但曰勾當某路水陸計度轉運事官高者則曰某
路計度轉運使太平興國初皆曰使兩省以上則為都

轉運使又置副使與諸路判官又置同勾當轉運事俄罷諸路副使真宗每用兵或令都部署兼轉運使王師征討則有隨軍轉運使事畢即停至道中詔曰天下物宜民間利病惟轉運使得以周知令更互赴闕庭見詢問焉慶厯中皆帶按察之任六年罷之先是判官與轉運爭權而罷至嘉祐中復置熙寧二年詔轉運使用本資序人即充資序下一等為權二等為權發遣中興以來逐路都轉運使除授不常惟使副判官常置舊制轉

運使除授皆命詞給誥渡江已後例給勅命後稍復舊
轉運使副命詞運判則否六年諸路運判亦命詞給告
光宗紹熙以來使副運判不雙除元置都轉運鹽使正
三品又有同知副使又置諸轉運使從三品有同知副
使又置漕運使從六品有副使知事等員

羣書要語粟行三百里則國無一年之積粟行四百里

無三年之積行五百里則衆有憂色

管任法篇

轉輸正稅

白六

帖漕運貢賦

漕引土貢充羨天府

國用軍儲

況

當富庶之朝宜崇漕運之任 領漕輓之務必在公勤

並同

漢追糧道委於丞相

蕭何

晉開轉運任在尚書

杜元

凱事並

陝路漕引悉歸中都

大詔

唐督餉朔都

曲阜行河

勾校奸賊末減賦取公財不耗疲人樂生

杜牧裴論制

綰牢

籠漕輓之職

同上

爾文學議論見推時輩久在近服宜知

朕自將輸之任假以汝行爾其布宣朕不遐棄

張于湖除夔路

運判

出總舟車之餉

曲阜行峽西運使制

往總一方刺篤之任

北行河轉

運制

遠採漢典設制舉之官近參唐制考將漕之最

胡文恭行

趙良規制

賦與衍增分輸錯出

同上

分部而名雖以將漕其實

在於總庶務之予奪察羣吏之能否

南豐除蔡燁制

古今事實

饋餉不絕

漢楚相拒滎陽蕭何守關中計戶轉漕給食不乏高祖

曰鎮國家撫百姓給饋餉不絕糧道吾不如蕭何

漢書

轉輸不絕

漢光武拜寇恂河內太守謂曰河內全富吾將因是而

欽定四庫全書

起昔高祖留何鎮關中吾今委公以河內堅守轉運給足軍糧光武於是北征恂收租四百萬斛轉以給軍時軍食乏恂以輦車驢馬轉輸前後不絕

後漢寇恂傳

漕給中都

高帝時漕山東之粟以給中都之官不過數十萬石孝武通西南夷道作者數萬人千里負擔餽糧率十餘鍾

致一石

職官分紀

漕給京師

昭帝五鳳中耿壽昌奏言故事歲漕關中穀四百萬斛以給京師用卒六萬人宜糴三輔弘農河東上黨太原郡穀足供京師可以省關中漕卒過半

前食貨志

開渠通漕

玄宗擢韋堅為陝郡太守水陸運使漢有運渠起關門西抵長安引山東租賦堅乃占咸陽壅渭為堰絕灞漚而東注永豐倉下復與渭合初漚水之左有望春樓堅於下漚為潭以通漕帝為升樓詔羣臣臨觀詔曰關輔

之間尤資殷贍比來轉輸未免艱辛故置此潭以通漕
運萬代之利一朝而成

唐韋
堅傳

置倉省運

唐裴耀卿同門下平章事充轉運使於是置河陰集津
三門倉引天下租絲盟津汴河而西三年積七百萬石
省運費三十萬緡或說耀卿請進所省腳錢以明功利
耀卿曰此盖公家盈縮之利爾不可以求寵乃奏充所
司和糴等錢明年遷侍中

置吏督察

唐韋堅善探候主意見宇文融等以力剝財物爭行進奉而置恩顧堅乃以轉運江淮租賦所在置吏督察以裨國之倉廩

負米先趨

劉晏與元載書曰見一水不通思荷鍤而先往見一粒不運使負米而先趨焦心苦形期報明主晏以轉運為任如是

通貨盈虛

唐王播字明敫充諸道轉運使程昇為副昇尤通萬貨盈虛

案牘剖析

王播充諸道轉運使雖案牘鞅掌剖析如流黠吏詆欺無不彰敗

必究利病

劉晏以轉運為已任凡所經歷必究利病運米數千萬

石以濟關中

分紀

并察治否

潘孟陽加鹽鐵轉運副使并察諸侯治否孟陽氣豪倨

所至會賓客留連倡樂

唐書

飛芻輓粟

秦欲攻匈奴使天下飛芻輓粟起於黃陞琅琊至負海

之郡轉輸河北率三十鍾而致一石

前漢書

木牛流馬

諸葛亮長於巧思木牛流馬皆出其意

糧儲粗備

范忠宣公純仁自陝西轉運副使召還神宗問曰卿在陝西久主漕輓必精意邊事城郭甲兵糧儲如何公對曰城郭粗安甲兵粗修糧儲粗備

言行錄

賦斂寬平

王待制質遷荆湖北路轉運使當用兵西方急於財用之時獨不進羨餘其賦斂近寬平治以常法他路不勝

其弊而荆湖之人自若

言行錄

較入歲增

李巽杜佑表為鹽鐵轉運副使俄代佑使任自劉晏後
職廢不振賦入朘耗巽蒞職一年較所入如晏最多明
年又過之又明年增百八十萬緡

按行利病

劉晏時大兵後斛米千錢禁膳不兼時旬裝援穗以輸
晏乃自按行浮淮泗達於汴入於河右循底柱碣石觀

三門遺跡至河陰輦洛見宇文愷梁公堰廝河為通濟渠視李傑新隄盡得其利病

許其心計

范旻為淮南使太祖遣曰卿貧凡所須並借用官錢悉以便宜從事不必一一申覆也每歲運米百餘萬石以給京師時論許其有心計

勿以秋毫

楊誠齋萬里謚文節漕運江東凡行部常禮一切不納

至於折俎交饋秋毫勿以自入悉歸之官為錢一千六

百萬

同上

奏減丁稅

蔡襄為福建路轉運使復古塘以溉民田人利之為生

祠於塘側又奏乞減閩人五代時丁口稅之半

神宗實錄

代輸郡稅

程大昌字泰之徙江西路運副公曰可以興利除害行
吾志矣歲儉出錢十餘萬緡代輸四郡五等夏稅折帛

遏饑民為盜之原

言行錄

虛廩賑饑

前漢山東水災民饑天子遣使虛郡國倉廩以賑猶不足使者分部護冠蓋相望費以億計

發粟濟饑

李士衡為河北都轉運使既至調發得策粟列郡有數

年之積其餘以濟饑民

職官分紀

更用驢輦

永平中理滹沱石舊河從都慮至羊肥倉欲令通漕太
原吏人苦後連年無成轉運所經三百八十加隘前後
沒溺死者不可勝筭鄧訓知大功難立上言遂罷其後
更用驢輦歲省費億萬計全活徒士千人

後漢鄧
訓傳

始募客舟

薛向為江浙等路發運使領均輸之職運舟兵士交相
侵盜貿易甚則託風水沈舟以滅迹向始募客舟以官
舟運費募寡而物良舊弊悉去

東都
事略

輸六路

權邦彥為淮浙荆湖等路制置發運使轉輸六路董煡
懈檢欺隱覈逋亡責稽滯水程陸轍餘五千里財用湊
足於行在所億萬計有詔嘉歎

楊誠齋集

通漕河

魯宗道遷江淮發運使通真揚漕河廢三堰舟楫使之

歲入以八百萬而食京師

東都事略

鑿泗州渠

蔣之奇字頴叔擢江淮荆浙等路發運副使元豐六年始建鑿泗州股渠以避長淮之險自是無覆溺者哲宗

朝再為發運使

東都事略

疏支家河

吳處厚紹聖初知蘇州居數月為江淮荆浙等路發運使疏支家河通漕楚海歲漕六百二十萬石至京師又修復泰州捍海堰成復通戶三千六百民為立生祠

同上

王鼎發八難

慶厯中王鼎為淮南江浙荆湖制置發運副使內侍王
永德奏請汳汴置鋪挽漕舟歲可省費六萬鼎議以為
不可三司判官一員將永德就鼎議發八難永德不復
爭鼎因言陛下幸用臣不宜過聽小人有所變更以誤
國計於是永德言始不用居二年遂為使

耀卿立中制

仁宗時都官員外郎吳耀卿景德中江淮漕米歲不過
四百五十萬石其後益至六百萬石故江淮之間穀價

常貴而民貧請約減平景德中歲漕之數立為中制上
乃詔發運司歲減漕米五十萬石

國史

以備賑糴

大中祥符三年江淮發運使李甫言今年運米六百七
十九萬石諸路留三年以備賑糴

職官
分紀

但惜民力

薛簡肅公天禧初為江淮發運使辭王文正公王無他
語但云東南民力竭矣薛退謂人曰真宰相之言也

言行

增米八十萬

張綸天禧中發運副使居二歲增米八十萬疏五渠導太湖入海復租米六十萬開長蘆西河以避覆舟之患又築高郵北漕以備非常仁宗謂執政曰發運總六路之廣財貨調用幣帛穀粟歲千百萬宜得其人而久仕之擢天章閣待制在職十有三年

同上

歲漕餘百萬

許元擢江淮荆大制置發運判官既又為使元曰以六
路七十二州之粟不能足京師吾不信也至則治千艘
浮江而上不數月京師足食乃考故事明信令發斂轉
徙遠近遲速賞罰皆有法凡江湖數千里外談笑治之
不擾不勞而用之足歲漕六百二十萬至京師而常餘

百萬

東都
事略

編財賦科約

李文簡公燾字仁甫

號巽齋
先生

除潼川路轉運判官州縣

多橫斂公選官置局括一道財賦列其名色使有無相
補酌三年中數而為帳編示官吏名為科約至今不廢

言行錄

置財賦都簿

文簡公副運江西置一路財賦都簿未幾召還乞令本
路毋廢此書上曰卿不為高論務在便民甚善

供調百萬億

李士衡河北漕真宗幸澶州東封西祀供調百萬億士

衡有力焉

減冶數十萬

陳文惠公堯佐為河東轉運使河東地寒而民貧奏除
石炭稅減官冶鐵課歲數十萬以便民曰轉運征利之
官也利有本末下有餘則上足吾豈為俗吏哉

言行錄

開營田贍邊

歐陽修出使河東開營田以贍邊儲至今賴之初執政
委修以河北之漕亦幸其不職而汙嫚其才修至頗稱

其職

興水利溉田

蔣之奇遷淮東路轉運副使歲饑募民興水利以食流
冗溉田九千餘頃如揚之天長三十六陂與宿之臨渙
橫斜三溝此其大者也

東都
事略

致堯劾魏庠

曾致堯為兩浙轉運諫議大夫魏庠知蘇州介舊恩以
進致堯劾其罪太宗曰是敢治魏庠可畏也

富弼薦王紘

富弼薦王紘為江東轉運紘常言不法之人如使肆貪
於一郡一邑害良民千萬家不若去之不止利一家

吏不得為奸

慶厯中王鼎遷尚書刑部郎中天章閣待制河北都轉
運使科率稅賦事皆躬親吏不得為奸

家莫敢為非

王素為淮南都運所布耳目甚廣人人若素坐視其家

莫敢為非

官吏為三等

景祐元年令諸路轉運使副察所部官吏能否辨為三等公勤廉幹文武可取利益於國惠及於民者為上幹事而無治聲者為次畏懦而貪慢公不治賊狀未露濫聲頗彰者為下並立狀以聞

邊粟支二年

蔣之奇為陝西轉運副使經賦所入以給用度公私用

足比其去庫緡八十餘萬邊粟皆支二年

東都事略

一切繩以法

孫甫為兩浙轉運使范文正守杭州以大臣或便宜行事公曰范公貴臣也吾屈於此不得不伸於彼矣由是一切繩以法而常以監司自處范公遇之無倦色及退而不能無恨公遇范公不少下退而未嘗不稱其賢也

言行錄

未嘗按一吏

陳文惠公堯佐六為轉運使常以方嚴肅下使人知畏而重犯法至於過失多保佑之未嘗按黜一吏

最為識大體

張士遜出為江西轉運使辭王文正公於政事堂公從容曰朝廷權利至矣士遜起謝後迭更是職思公之言未嘗求錐刀之利識者曰此運使識大體

同上

可為諸路法

鮮于侁字子駿閬中人范景仁舉所知除利漕兼提舉

常平上曰鮮于侁定利路後法可為諸路法又上書陳
時政闕失曰可為憂患者二可為長大息者三移京都
轉運使

頗牧在禁中

李迪真宗問陝西兵數對曰臣為轉運使時以方寸小
冊記兵及糧以備調發今猶置佩囊中真宗令擇取之
因給紙令上數以進曰不意頗牧在吾禁中矣

賜緋衣

侯陟除淮南轉運使賜緋衣袋帶

袋帶以錄人才也

賜羊酒

王隨直史館出為京西轉運使時隨父母在洛中京西乃其所部也真宗賜詩寵其行復以羊酒賜使過家時

人榮之

東都事略

古今文集

雜著

淮南轉運使謝上表

蘓頌

贊畫甘泉久玷三臺之末觀風淮甸驟陞數使之榮朝
寄匪輕地望兼重愧非才選靡定厥官姑謹詔期趣行
所部寵靈所被畏惕非常竊以州郡備官所以分釐於
民務朝廷遣使所以布宣乎主恩付一道之事權用六
條而舉察賦輿出內俾以均輸吏治否臧責之薦黜自
匪繇更於事任詎能振肅於治綱若臣者才不足以適
時慮不足以經遠偶緣資級之例得從選用之階始自
書坊出分使竹俄從褰服入佐計籌粗收歲月之勞蔑

著毫分之效豈謂伏遇皇帝陛下察庶工之任使矜人
職之良勤拔於省僚授以利柄矧惟青海之郡實溢東
南之衝昔號奧區今逢樂歲五稼盈疇而遂茂四人勤
力以厚生料平漕運之程無煩趣辦之急惟當敷宣惠
澤通究物情編齊之利病可更立求其本刑政之重輕
或失當適其中止期嘉靖少稱論擇若乃事體貌以為
風采盡銖兩以斂民財顧在懦愚誠多闕略重念上慈
天覆聖治日新官無內外之殊事悉憂勤之繫昨臣受

任之始獲面於清光陛下臨遣之言曲加於勉諭自省
最為於疎遠何圖亦記於淵衷豈非以委任之優故特
示拊循之厚雖乾坤平施非報謝之可言而犬馬微生
第勤勞而思奮倘驅馳之有用期終始以無渝

江東漕謝到任表

真德秀

兩螭夾侍久點近班四牡載馳叨分劇部假中秘隆儒
之寵為外臺將指之光望過所期感深以惕臣某中謝
伏念某材非適用生幸逢辰屬漢廷更化之初首唐室

登瀛之選金鑿夜直承密命者六期玉陛晨趨對清光
於再稔凡吮墨濡毫之任皆振纓戮弁其間吏責既稀
所願優游於邇列主恩未報寧忘眷戀於本朝其如親
闕喜懼之年當謹人子清溫之職輒援公輔辭翰林之
請庶幾潘岳奉版輿之懽分太守之符日須成命出少
府之節遽冒殊恩懷章而過里門閱宿而臨封部敬卜
中和之節重宣寬大之書輶傳初馳旄倪爭覩謂朝廷
所以輟柱下之史蓋聖主所以惠江左之民因博采於風謠

頗究知其疾苦以垂罄之家而困追需之目以屢豐之
歲而多流徙之人官無足證之簿書里有難平之徭役
文移星火不勝胥吏之誅求牒訴丘山半為賦租之煩
重興言及此勿掾可瘳輒殫朝夕之咨諏兼體公私之
緩急賦難遽省合漸損賦外之征民未易蘇當先去民
間之蠹竊自量其絀薄恐終負於選掄茲蓋恭遇皇帝
陛下洪造曲成大明博照念臣志存將母俾獲便於旨
甘知臣學本愛人欲稍觀其政事肆加遽職仍畀重權

臣敢不以阜俗為阜財之方以悅民為悅親之本灌輸所仰媿初無鞭策之能樽節是先惟敬佩玉音之訓

廣東除運判謝到任表

劉克莊

庾氏命官法宜久任漕臣乏使恩許驟遷外竊光華內叢憂懼中謝臣恭惟列聖尤重遠臣在裕陵時命端願之前輩及淳熙世用光朝之老儒非取其趣辦之能蓋責以將明之事如臣迂拙荷上使令憤士風之垢汙慨國計之殫乏雖有范滂之志終非所長豈無韓滉之心

不膽於力君命幾於辱矣臣罪猶自知之曾謂選掄就
令飛輓塞下之餉方急湟中之糴復興每於吏民相告
語之間具言朝廷不得已之意然而東南之勢久矣乖
張中上之家今皆瓶罄芹味若可羹而為獻葵根恐因
刈而愈傷况詔書之丁寧極聖意之慘怛若為展究稍
釋顧憂茲盖伏遇皇帝陛下德照百官明見萬里並收
多士莫非建功立事之才不棄諸生有取固本深根之
說乃如孤外亦在選中臣敢不益秉公清少蘇凋瘵馳

驅原隰務畢達於下情臨履淵冰庶不隳於晚節

請置廉察罷轉運議

黃亢

惟王建國稽古治人既設其官必立其長歷觀方冊可得而知其在唐虞則十有二牧在三代則有連率焉有方正牧焉在兩漢則或稱刺史或稱州牧其實一也在皇唐則其大府有節度其次有觀察皆所以綱舉百職柄持衆政作天子之藩宣也是故民之所仰望吏之所畏服朝之所毗倚其官必重其人必賢也今則不然外

官小大自足及顙悉統之轉運轉運非古也起唐中葉所以督錢穀而已矣今夫用錢穀之職總守宰之官守宰主宣教化者也教化義也錢穀利也利與義不能兩全以下是憂歲之不登而民之不粒上恐財之不豐而貢之不多是上下相戾也矧其充使者不過郎官御史其官既輕其人未必賢是民所仰望者卑也吏所畏服者弛也朝之毗倚者輕也使政不平刑不清和氣未充祥鳥未來得非由此歟有芻蕘之民竊議於下曰錢穀

之職宜委之郡守郡守縣宰宜統之廉察則廉察宜置
轉運宜罷也所以復古官也不使吾民謂天子重利而
薄義也不知朝廷三事大夫為是耶為非耶

古詩

送劉士彥赴福建漕

黃山谷

西風持漢節騎從嚴弓刀維閩七聚落惇孤困吏饗土
敝未泰惡水煩鮮介勞南驅將仁氣百城共一陶察人
極涇渭問俗及豚羔

謝鮮于君

蘇子瞻

我懷元祐初珪璋滿清班維時南瘡老奉使獨未還迂
叟向我言青齊歲方艱斯人乃福星遣出虛危間

送程之元江西運判

張文潜

歸去明光見天子還指一節大江西年來屢下寬大詔
赤子未免寒與饑恩如受病政如藥知病與藥何由治
此行委寄意不淺列城數十受指麾

上漕使

唐子西

持節三千里提封一十州天文占使入地上覺錢流吏
有言前信農無賦外求事授餘日畢政舉大綱休利源
乾後溢民瘼痼還瘳印給中臺筆行馳外部籌

律詩

送程公闕轉運江西

王介甫

江西一節鑄黃金最慰章濱父老心直獮重來真強予
次公今不異重臨餘風尚有歡謠在陳迹非無勝事尋
豫想新詩能寄我十年華省故情深

送韓希道

亞卿

移漕江東

周必大

饋餉隨蕭不作難
秦淮今視漢秦關
天開虎踞龍盤處
地近雞翘豹尾間
洗印先經三峽寺
觀風徧踏九華山
盡收奇秀歸詩橐
却趁賡歌供奉班

送芮國器察院漕廣東

周必大

星聚曾尊德
箕張各避風
別離雙鬢異
邂逅一尊同
五嶺皇華使
扁舟漁釣翁
江分鴻不到
書札若為通

送王詹叔利州路運判

王介甫

王孫舊讀五車書手把山陽太守符未駕朱轡辭輦轂
却分金節佐均輸人才自古難常得時論如君豈久孤
去去便看歸奏計莫嗟行路有崎嶇

送周元吉顯謨左司將漕湖北

楊廷秀

君詩日日說歸休忽解西風一葉舟黃鶴樓前作重九
水晶宮裏過中秋職親六閣仍金馬喜入千屯看木牛
繡斧光華誰不羨一賢去國欠人留

又見周郎攜小喬武昌赤壁醉嬌嬈蜀江雪水來三峽
吳苑風煙訪六朝秋月春花出肝肺新詞麗曲入笙簫
歸來却侍金華殿好看霜毛映珥貂

彼此江湖漫浪翁相逢遞宿省西東兩窮握手論詩後
一笑投膠入漆中臨水登山公別我青鞋布襪我從公
貂裘已博江西艇只待黃花半席風

送沈虞卿秘監修撰將漕江東

楊廷秀

蓬萊仙伯沈東陽領袖諸儒太極旁東壁二星雲漢近
西崑羣玉簡編香雞翹豹尾無多子錦纜牙樯有底忙
惟有江山入詩集却歸天上侍虛皇

送韓子雲檢正將漕江東 楊廷秀

宰士仍名士詩人更德人還家桐樹古攬轡繡衣新不
以髯邊雪而忘句裏春登庸衣鉢在得戀大江濱

送沈虞卿秘監將漕江東二首

洪邁

天上圖書羣玉府仙晨日月道家山行行合在煙霄地
去去猶參論議班使者繡衣看更好從官華索未應慳
寨帷了却江東事不到終更便賜環

無復同趨尺五天湖山佳處想聯翩看君揮手謝送者
使我銷魂惟黯然閃雨不成張祖席停雲空自寄詩篇
過家莫作多時住聞道東人正可憐

送陳魯叟使君赴廣西漕 劉克莊

闔郡留無計匆匆奪父師使君三月政遺老百年思遠

金少卿八十二
卷八
宦生華髮輕裝載舊碑海山應有恨未得謝公詩

送林子方吏部將漕江東樓鑰

光堯三紀煥文章寶閣峒堯謹秘藏寓直到君才第四
皇華禮樂遠增光

望郎三度到長安
垂上青雲作好官
暫向江東一澄按
却歸徑著侍臣冠

自說嵇康七不堪
上教持節向江南
江南父老應相賀
見說清名似晦菴

寄江東真漕德秀

劉漫塘

金陵千古帝王都
肉食何人解遠圖
只有愛民真學士
不慙通務漢三儒

餞雷都運

楊廷秀

朱轡玉節偏南紀
錦帳綾衾擁望郎
使星下臨翼軫旁
西山南浦回風光

贈漕運夏寺丞

魏野

威權自與轉輸同
僕從衙庭事事雄
十郡山河關職掌

金史卷八
卷八
一門忠孝是家風

送傅安道將漕七閩

楊廷秀

一代風騷將百年忠義家出關稱使者踏雪看梅花

獻張禮部

王禹偁

二十登庸冠列仙當時便合掌王言因為甘露蘇黔首
未放祥雲入禁垣

送周元吉將漕湖北

職親六閣仍金馬喜入千屯看木牛繡斧光華誰不羨

一賢去國欠人留

送杜侍御陝西轉運

陳後山

餽糧千里百無策
木牛流馬功不休
關中正須蕭丞相
省內早要富民侯

勸農使

歷代沿革唐有覆田
勸農使宋至道二年以太常博士
陳靖為勸農使勸民墾田
以大理寺丞皇甫選光祿寺
丞何亮副之尋罷景德三年詔諸道轉運使副使開封

府知府及諸道知州刺史少卿監以上並兼勸農使其
餘知州知軍通判等並兼勸農事天禧四年改諸路提
點刑獄為勸農使副兼提點刑獄公事各賜農田勅一
部天聖四年令逐路轉運司自今勸農一司更不置司
行遣取索文字元置勸農使司有勸農使副使各一人
又有各道巡行勸農使凡掌勸天下力田之事

古今事實


請付諸路

天禧四年利州路轉運使李昉請雕印四時纂要齊民要術付諸路勸農司

請行天下

唐宇文融開元中為覆田勸農使乃奏慕容琦等二十九人為勸農判官按州縣括正丘畝招徠戶口而分業之又兼租地安輯戶口使於是諸道收沒戶八十萬田亦稱是歲終羨錢數百萬緡帝悅拜為御史中丞然吏下希望融旨不能無擾初議者以生事沮詰百端而帝意

向之宰相源乾曜等佐其舉公卿雷同不敢異惟楊瑒
以為籍外取稅百姓困敝坐左遷融乃自請馳行天下
事無巨細先上勸農使融與楊慎矜父子以勾剝財物
爭行進奉而致恩堅固



古今事文類聚外集卷八